

HTESALONI Pê Chyáng Hî Dàm Hun Kat é Laiká (1 Thessalonians)

¹ Ngò Poluq, Sila* eq Timohti pé gi, Íwa Garai Gasang eq Yhumsîng Yesuq Hkrisduq má nghut nyî bê bang, haû Htesaloni wà mó byu pê é noqkuq hpúng lé dang kyô kat lhê. Garaî jeju eq nguingón hkyô gi, nungmoq chyáng ru joq nyî sháng gaq.

Jeju Hkya-ôn É Hkyô

² Ngamoq gi, hkâ-nhám le, nungmoq banshoq bâng é matú, Garai Gasang lé jeju hkya-on lui, ngamoq é kyûdung dang má nungmoq lé bo dúng lhôm nyi lhê. ³ Nungmoq é lumjîng myit mai zui saî é nungmoq é muzó lé le; chyitdap myit é yanmai, nungmoq shikut é hkyô lé le; nga-nhûng é Yhumsîng Yesuq Hkrisduq má myit myoqbyu tô é yanmai, nungmoq hkam jân é hkyô lé le, nga-nhûng é Íwa Garai Gasâng é hí má, ngamoq ru bûn nyi lhê.

⁴ Garai Gasang chyitdap é gumang wui ê, Yhang nungmoq lé hkyin yù bê lé, ngamoq sê lhê. ⁵ Hkâsu mù gâ le, ngamoq é gabú danglù gi, nhutdang dông za nungmoq chyáng jé é a nghut, wum-o a-tsam dông le, Chyoiyúng Woi-nyí dông le, tengmán hkyô byíng jup é dông le, jé bê nghut é yanmai nghut lhê. Ngamoq, nungmoq eq rahá nyi é hkûn, nungmoq é matú hkâsu kut laî lo é hkyô lé, nungmoq sé gù

* **1:1** Sila lé gi, Salwanu le gâ lhê.

nghut lhê. ⁶ Nungmoq gi, wuîhke jamjau myo myo hui zo kôlhang, Chyoiyúng Woi-nyí byí é gabú myit mai, danglù haú lé lhom yù kôluí, ngamoq lé le, haú Yhumsing lé le, alik kut yu é bang dut bekô nghut ri. ⁷ Haú mù, Makedoni mau eq Ahkaia mau mâ é lumjínq bang banshoq é alik, nungmoq dut bekô nghut ri. ⁸ Nungmoq chyáng mai, Makedoni mau eq Ahkaia mau má, haú Yhumsing é mung-dang hù htoq ló e za a nghut, Garai Gasang má nungmoq lumjínq hkyô gi, jowò hkangmó jam ló bê nghut luí, ngamoq gi, haí le taí nó a ra lo nghut ri. ⁹ Hkâsu mù gâ le, ngamoq lé nungmoq hká dông lhom hkulum yu é hkyô lé, yhangmoq yhang, ngamoq lé shit kyo akô. Nungmoq gi, hparà lhô pé lé tô pyám luí, Garai Gasang shut hkâsu kut lhing lò mù, rû dui nyi é eq tengmán é Garai Gasang lé dojaú nyi é hkyô lé le; ¹⁰ mauhkûng mâ é haú Yhang Zo lé lánq nyi é hkyô lé le, yhangmoq taí kyô akô. Yhangzo haú gi, Yhang èq shi é mai lhoq dui toq yu é hui luí, jé lô râ nhikmó yo hkyô mai nga-nhúng lé hkyi yù sù, Yesuq nghut ri.

2

Poluq, Htesaloni Wà Mó Má Garaí Mû Wùn Waq É Hkyô

¹ Gumang wuì ê, nungmoq chyáng ngamoq lé kûm é hkyô gi, akôm a nghut é lé, nungmoq yhang sê lhê. ² Nungmoq sê é eq rajung za, ngamoq gi, hí hkûn, Hpilipi wà mó má wuîhke jamjau eq rhoí é huí wú bê nghut lhê; nghut kôlhang, nga-nhúng é Garai Gasang garúm é yanmai, gyaí lhom htuq htîng é hui kôle, Garai Gasâng é gabú danglù lé, a

gyuq a kyum nungmoq lé wám taí kyô é nghut lhê.
³ Hkâsu mù gâ le, ngamoq lhoq pun lhoq kyîng é hkyô gi, shut é, a nghut jáng, a sansêng é i-mytit dông eq nungmoq lé mhaú zô é dông a nghut e za,
⁴ haú gabú danglù lé chùng gíng é bang ga, Garai Gasâng chyáng mai ahkáng wó é dông za, ngamoq taí é nghut lhê. Ngamoq gi, byu pé lé gabú nhâng râ matú a nghut, ngamoq é myit lé chyam wú nyi é Garai Gasang lé, gabú nhâng râ matú shikut é ru nghut lhê. ⁵ Hkâsu mù gâ le, nungmoq sê é eq rajung za, ngamoq gi, lhoq ngón mhaú é dang le hkâ-nhám a chùng wú, nghop tô é myoqnoq myit le hkâ-nhám a bò, Garai Gasang gi, ngamoq é saksé nghut lhê. ⁶ Ngamoq gi, byu pé mai le, nungmoq mai le, gotû ó yuq mai le hkya-on râ lé ho nyi é a nghut, Hkrisduq é lagyô pé nghut é eq rajung za, nungmoq lé wòlai hùn naù jáng wó hun lhê; nghut kôlhang, ⁷ înu rayuq, yhang é zoshâng zô pé lé hku baú é su, nungmoq chyáng nú-nhâm é dông nyi laí lò bê nghut lhê. ⁸ Ngamoq gi, nungmoq lé gyai yhang chyitdap luí, Garai Gasâng é gabú danglù za a nghut, ngamoq é asak pé nungmoq lé byî pyâm le lhang nhik dik lhê; hkâsu mù gâ le, nungmoq gi, ngamoq chyitdap dik é bang dut bekô nghut é yanmai nghut lhê. ⁹ Gumang wuì ê, nungmoq gi, ngamoq gyai yhang mù zuí shikut é hkyô lé, gè gè bun kó râ nghut lhê; Garai Gasâng é gabú danglù lé, nungmoq chyáng ngamoq hko kyô é u lé, ó yuq lé le, ngamoq mai wòlai a byi sháng gaq nghû, ngamoq gi, nyí lé, myín lé, mù zuí é nghut lhê.

¹⁰ Ngamoq gi, lumjîng bê bang nungmoq é hí má, hkâsu chyoiyúng é eq dingmán é, mara hùn

râ a bo é bang dut laî lo é hkyô lé, nungmoq le, Garai Gasang le, saksé nghut lhê. ¹¹ Hkâsu mù gâ le, ngamoq gi, îwa rayuq mai yhumsing yhangzô pé lé kut byî é su, nungmoq yuq hkangmó lé, myit wum byî nyi é hkyô lé le, nhik taî tîng nyi é hkyô lé le, ¹² Yhang é mingdán eq hpungwup shingkang má, nungmoq lé wut yu é Garai Gasang eq gingdán é dông, nungmoq asak wó dui nyi sháng gaq nghû, nungmoq lé wum byî nyi é hkyô lé le, nungmoq yhang sê nyi lhê.

¹³ Ngamoq gi, ngamoq chyáng mai nungmoq wó gyô yu é Garai Gasâng é mungdang lé, nungmoq lhom yu é hkûn, byu é dang lé lhom yu é dông a nghut e za, lumjîng é bang nungmoq má mù zuî nyi é, haû Garai Gasâng é mungdang lé yhang, lhom yù kô é yanmai, Garai Gasang lé xoq xoq jeju hkya-ôn nyi lhê. ¹⁴ Gumang wuî è, nungmoq gi, Hkrisduq Yesuq má nghut nyi é, Yuda mau má joq é Garai Gasâng é noqkuq hpûng pé lé, alik kut yu é bang dut bekô nghut ri. Noqkuq hpûng haú pé gi, Yudaq byu pé zing-rî é lé hui zô é su, nungmoq le, yhumsing mau mâ é byu pé zing-rî é lé hui zô akô nghut ri. ¹⁵ Yudaq byu pé gi, haû Yhumsîng Yesuq eq myiqhtoî pé lé sat pyám kôluî, ngamoq lé le hkat htoq akô. Yhangmoq gi, Garai Gasang a ô nau é hkyô kut é bang, byù lhunglhang eq gyè dut é bang nghut akô. ¹⁶ Tûngbaù pé hkyi yù hui râ matú, ngamoq hko kyô é hkyô lé, yhangmoq hkûm akô; yhangmoq gi, hkâ-nhám le, yhumsing é mara lé dik shoq haú dông lhoq jat myô yù akô nghut ri. Haû mù, Garai Gasâng é nhikmo-yô é hkyô gi, yhangmoq ahtoq má jé bê nghut ri.

Htesaloni Byu Pé Lé Poluq Huí Nau Nyi É Hkyô

¹⁷ Gumang wuê ê, ngamoq gi, rayoq zo nungmoq eq myoqdong byam gâng to kôle, myit gi, a gâng é nghut lhê; nungmoq lé gyai bun-nghâm nyi luî, wó myang hui shoq nghû, ngamoq gyai yhang shikut nyi lhê. ¹⁸ Nungmoq chyáng ngamoq jé lé naù mù luî, ngò Poluq yhang, adàm dàm shikut wú bê; nghut kôlhang, Tsadán gi, ngamoq lé hkûm tang pyâm ri. ¹⁹ Hkâsu mù gâ le, nga-nhûng é Yhumsîng Yesuq Hkrisduq é hí má, Yhang jé lé é hkûn, ngamoq é myit myoqbyù hkyô, gabú hkyô eq gumrông râ janmaú gi, haí jung wá nghut lhê gâ le, nungmoq yhang nghut nyi lhê a nghut kó lú? ²⁰ Gè gè yhang, nungmoq gi, ngamoq é gumrông jowò eq gabú hkyô nghut nyi ri.

3

¹ Haù mù luî, ngamoq gi, haù lé a wó jân nyi lo jáng, Ahten myuq má ngamoq baú nyi gyó le je gè râ nghut lhê nghû, myit hpyit yù mù, ² wuîhke jamjau shí pê é yanmai, ó yuq le, myit a hten kó sháng gaq nghû, nungmoq é lumjîng hkyô má, nungmoq lé wum-o byi râ eq myit wum byi râ matú, ³ Hkrisduq é gabú danglù lé hko kyô é hkyô má, ngamoq é gumang eq Garai Gasâng é mù wùn luzúm nghut é Timohti lé, nhang kat é nghut lhê. Nga-nhúng gi, wuîhke jamjau pé hui zo râ matú, hkyin to huî é bang nghut é lé, nungmoq yhang rago sê nyi lhê. ⁴ Nga-nhúng gi, zing-ri hui zo râ nghut lhê nghû, ngamoq, nungmoq eq rahá nghut nyi é hkûn, noq mai nungmoq lé ngamoq taí kyô nyi gù nghut bê. Nungmoq rago sê é eq rajung za, haú dông dut bê nghut ri. ⁵ Hau é yanmai, ngò a

wó jân nyì lo jáng, haû gunглаú sù mai nungmoq lé gunглаú yû luí, ngamoq wùn waq bê muzó gi, akôm dut byuq rá lé, myit chiq mù, nungmoq é lumjǐng hkyô lé wó sé rá matú, yhang lé ngò nhang kat é nghut lhê. Gunглаú sù gi, nat Tsadán nghut lhê.

Timohti Lo Shit Kyô É Wum Byi Dang

⁶ Ahkuí kúm, Timohti gi, nungmoq é lumjǐng hkyô eq chyitdap myit eq sêng é gabú danglù pé lé, nungmoq chyáng mai ngamoq chyáng wun jé lô byi bê nghut ri. Nungmoq, hkâ-nhâm le, ngamoq lé rago bún nyi é hkyô lé le; ngamoq, nungmoq lé myàng nau nyi é eq rajung za, nungmoq, ngamoq lé myàng nau nyi é hkyô lé le, yhang lo taí kyo bê nghut ri. ⁷ Haû mù luí, gumang wuì ê, ngamoq myit myo uhkyí é hkyô eq zing-ri huí é hkyô pé banshoq má, nungmoq é lumjǐng hkyo é yanmai, nungmoq eq séng luí myit wum byi é hkyô lé ngamoq wó yû bê nghut lhê. ⁸ Ahkuí, ngamoq gi, haû Yhumsîng má nungmoq yap gǐng nyi kô é yanmai, gè gè nyi ngón bê nghut lhê. ⁹ Nga-nhûng é Garai Gasâng hí má, nungmoq é yanmai, ngamoq myang hkam yu é gabú hkyô banshoq lé myit kat wú jáng, ngamoq gi, nungmoq é matú Garai Gasang lé hkâsu kut jeju ûng hkya-on rá lhú? ¹⁰ Ngamoq gi, nungmoq lé dum myàng rá matú eq, nungmoq é lumjǐng myit má langhpyut é hkyô lé wó lhoq hkúm byi rá matú, nyí, myín, gyai yhang lhumzui luí kyûdûng nyi lhê.

¹¹ Nungmoq chyáng ngamoq lé rá matú, nga-nhûng é Yhumsîng Yesuq eq nga-nhûng é Íwa Garai Gasang yhang ngamoq lé hkyô hpóng byi sháng

gaq. ¹² Nungmoq lé ngamoq chytidap nyi é su, haû Yhumsîng gi, nungmoq é chytidap myit lé, rayuq eq rayuq é ahtoq má le, yuq hkangmó é ahtoq má le, lhoq kô jat, lhoq pyíng byi sháng gaq. ¹³ Nga-nhûng é Yhumsîng Yesuq gi, Yhâng é chyoiyúng bang banshoq eq rahá lé é hkûn, nga-nhûng é Îwa Garai Gasâng é hí má, nungmoq gi, mara hûn jowò a joq é eq chyoiyúng é bang dut râ matú, nungmoq é myit nhiklhum má, haû Yhumsîng mai wum-o lhoq kíng byî nyi sháng gaq. Yhâng é chyoiyúng bang gâ é gi, byù lé, a nghut jáng, maumang lagyô pé lé, taí záng lhê.

4

Garai Gasang Ô Nau É Đông Asak Dui Râ Hkyô

¹ Xoq luî taí nau é gi, gumang wui ê, ngamoq gi, ahkuî nungmoq cháng nyi é eq rajung za, nungmoq hká đông nyi yap luî, Garai Gasang lé gabú nhâng râ hkyô nungmoq lé mhoqshit byi bê nghut lhê. Ahkuî le, ngamoq gi, shí hkyô lé nungmoq hau htoq je wó châng jat râ matú, Yhumsîng Yesuq má nungmoq lé dúng tôngbán luî, myit wum byi kat lhê. ² Hkâsu mù gâ le, nungmoq gi, haû Yhumsîng Yesuq é ahko ahkáng đông, ngamoq mai, nungmoq lé mhoqshit to byî é hkyô pé lé, sê akô nghut ri.

³ Garai Gasang ô nau é hkyô gi, haû nungmoq sân-yúng é hui râ matú le, ashop é đông gungsho zùm yap é hkyô lé koi pyám râ matú le; ⁴ nungmoq yuq hkangmó gi, haû Garai Gasang lé a sê é, a lumjíng bang kut é su, gungsho yut yut ô nau é hkyô a châng e za, ⁵ haû chyoiyúng é eq hkungga gíng é sù wó dut shoq, yhumsing gùng lé wó hkang

é hkyô mhoq yû râ matú le; ⁶ shí hkyô eq séng luí, ó yuq le, yhumsing é gumang lé, a ge shut, a ge lhúngzo râ matú le nghut lhê. Ngamoq, nungmoq lé taí kyo mù, lhoq pun lhoq kying gù nghut bê eq rajung za, haû Yhumsîng gi, haû hkyô shut é banshoq lé, dam byi râ nghut lhê. ⁷ Hkâsu mù gâ le, Garai Gasang gi, nga-nhúng lé a sân-yúng é bang dut râ matú wut yu é a nghut, chyoiyúng é dông asak dui nyi râ matú sheq wut yu é ru nghut lhê. ⁸ Haû mù luí, mhoqshit hkyô shí lé he-ngik pyâm é sù gi, byù lé he-ngik é a nghut, haû nungmoq lé, Yhâng é Chyoiyúng Woi-nyí byi tô é sù, Garai Gasang lé he-ngik pyâm é sheq ru nghut lhê.

⁹ Rayuq eq rayuq chyitdap lhum râ matú, nungmoq yhang, Garai Gasâng eq mhoqshit é hui bekô nghut é yanmai, gumang yhangchang chyitdap lhûm é hkyô eq séng luí, ngamoq gi, nungmoq chyáng kê kat byi a ra lo nghut ri. ¹⁰ Haû eq rajung za, nungmoq gi, Makedoni mau gón mâ é gumang wuì banshoq lé chyitdap nyi akô nghut ri. Nghut kôlhang, gumang wuì ê, haû su je myo kut râ matú nungmoq lé ngamoq wum byi lhê.

¹¹⁻¹² Nungmoq é nyí wui lhê é asak dui hkyô má, gotû byu pê eq hkunggâ é wó yû luí, ó yuq lé le, lumhkaû a ra wó dut sháng gaq, hí hkûn nungmoq lé ngamoq taí kyô tô é eq rajung za, num num byù zè râ hkyô lé le, yhumsîng eq a séng é hkyô a kut wún râ lé le, yhumsing loq eq zui saí mù nyi râ lé le, nungmoq é myit myoqbyù jowò kut yû keq.

Haû Yhumsîng Gyó Lé Râ Hkyô

¹³ Gumang wuì ê, myit myoqbyù hkyô a wó é byù góbang su, nungmoq, iyon ningtsáng a dut kó

sháng gaq, haû yhup ngón byuq é bang eq séng luî, nungmoq a sé râ lé, ngamoq a ô nau é nghut lhê. Yhup ngón byuq é bang gâ é gi, lumjínng luî shi ló byuq é bang lé gâ é nghut lhê. ¹⁴ Hkâsu mù gâ le, Yesuq shî luî, dum dui toq bê hkyô lé nga-nhúng lumjínng é yanmai, Garai Gasang gi, Yesuq má yhup ngón byuq é bang lé, Yesuq eq rahá shuî lé râ nghut lhê nghû, nga-nhúng lumjínng é nghut lhê. ¹⁵ Haû Yhumsínng taî é dang eq rajung za, nungmoq lé ngamoq taî kyo kôlé, haû Yhumsínng dum lé é hkûn, asak dui nyi é eq myit gyo tô é bang nga-nhúng gi, yhup ngón byuq bê bâng htoq ratsuí le wó hí rá a nghut. ¹⁶ Hkâsu mù gâ le, haû Yhumsínng yhang gi, htê mó hkunmó èq le, maumang lagyo mó é hte èq le, Garai Gasâng é tutmó mut hte èq le, mauhkûng mai gyó lé lô luî, haû Hkrisduq má shi ló bê bang hí dui toq râ nghut lhê. ¹⁷ Hau htâng, asak dui nyi é eq myit gyo tô é bang nga-nhúng gi, yhangmoq eq rahá mhut htoq má shuî toq yu é hui luî, maulat má haû Yhumsínng eq hui râ nghut lhê. Haû hkûn, nga-nhúng gi, haû Yhumsínng eq ahtum abyuq nyi nyi berâ nghut lhê. ¹⁸ Haû mù luî, nungmoq gi, dang shí pé mai rayuq eq rayuq myit wum byí lhûm nyi keq.

5

¹ Nghut kôlhang, gumang wuî ê, ahkyínng buinyì eq séng luî, nungmoq lé ngamoq kê hûn byi a ra lo nghut ri. ² Hkâsu mù gâ le, haû Yhumsínng é buinyì gi, myín lé hkau sù wang é su jé lé râ nghut é hkyô lé, nungmoq rago za sê akô nghut ri. Yhumsínng é buinyì gi, Yesuq dum jé lé râ buinyì lé taî nau é nghut lhê. ³ Byu pé gi, 'Nguingón yuqyo ri.' ga taî

nyi bùm kô é u lé, gùng lai é myiwe rayuq zohkû-nò no lo é su, htên byoq hkyô gi, byodàn tung yhangmoq chyáng jé luí, hká dông lé yhangmoq wó hfang lut kó râ a nghut.

⁴ Nghut kôlhang, gumang wui ê, nungmoq gi, mauchut hkaû má nyi é bang a nghut é yanmai, buinyi haû gi, hkau sù lé é su, nungmoq é matú byodàn tung dut râ a nghut. ⁵ Nungmoq lhunglhang bang gi, maubó é yhangzô pé eq nyi é yhangzô pé nghut lhê. Nga-nhúng gi, myín eq mauchut hkaû eq sêng é bang a nghut. ⁶ Haû mù luí, nga-nhúng gi, byù góbang su a yhup nyi e za, machyâ luí, gying gying kut nyi sháng. ⁷ Hkâsu mù gâ le, yhup é bang gi, myín lé yhup akô; î shuq wut é bang le, myín lé shuq wut akô. ⁸ Nghut kôlhang, nga-nhúng gi, nyi eq sêng lhê nghut é yanmai, gying gying kut nyi luí, lumjín myit eq chyitdap myit lé gi, wànggò-long lé su gò to, hkyi yù hui râ lé myit myoqbyù tô é hkyô lé gi, shamtoq-muq lé su tsung to, kut sháng. ⁹ Hkâsu mù gâ le, Garai Gasang gi, Yhâng nhikmo-yô é hkyô lé hkâm zo râ matú, nga-nhúng lé hkyin tô é a nghut e za, nga-nhúng é Yhumsîng Yesuq Hkrisduq mai, hkyi yù hkyô lé nga-nhúng wó yû râ matú hkyin to bê nghut lhê. ¹⁰ Yesuq gi, nga-nhúng yhup bûn nyi kôlhang, yhup ngón to kôlhang, Yhang eq rahá wó nyi nyi sháng gaq ga, nga-nhúng é matú shî hkám byi bê nghut ri. ¹¹ Haû mù luí, nungmoq gi, ahkuí, nungmoq kut nyi é eq rajung za, rayuq eq rayuq myit wum byi lhum mù, htuqluq htuqbáng kut lhúm nyi keq.

Ló Htâng Lhê É Mhoqshit Hkyô

¹² Gumang wuì ê, nungmoq mâ é muzó shikut luí, haû Yhumsîng má nungmoq lé up nyi é eq lhoq pun lhoq kyîng nyi é bang lé, nungmoq hkungga râ matú le; ¹³ yhangmoq zui saî é muzó jizó é yanmai, yhangmoq lé chyitdap myit dông gyai yhang hkungga râ matú le, nungmoq lé ngamoq sang kat lhê. Nungmoq le, rayuq eq rayuq nguîngón lhûm nyi keq. ¹⁴ Gumang wuì ê, nungmoq lé ngamoq wum byî kat nau é gi, lagôn é bang lé lhoq pun lhoq kying keq; nhiknge é bang lé myit wum byi keq; wum nyhôm é bang lé htuqluq htuqbáng kut keq; yuq hkangmó lé, i-myit hîng byî nyi keq; ¹⁵ ó yuq lé nghut kôlhang, a ge é hkyo é yanmai, a ge é dông a taû kut râ lé lhoq pun lhoq kyîng nyi keq; nungmoq rayuq eq rayuq le, góbang banshoq eq le, shikut luí, hkâ-nhám le, ge é hkyô kut byî lhum nyi keq.

¹⁶ Hkâ-nhám le, ru gabú nyi keq; ¹⁷ abyit alan kyûdûng nyi keq; ¹⁸ hkyô hkat hkangmó má jeju hkya-ôn nyi keq, hkâsu mù gâ le, haû pé gi, Hkrisduq Yesuq má, nungmoq é matú Garai Gasang ô nau é hkyô pé nghut lhê.

¹⁹ Haû Woi-nyí lé hkâlhoq jôm pyám kó; ²⁰ myiqhtoi htoî é lé, haî su a ngàm hkâkut kó. ²¹ Jung hkangmó lé, chyam wú luí, ge é hkyô lé zú zîng nyi mù, ²² agè ashop é hkyô hkangmó lé, koi pyám keq.

²³ Nguîngón hkyo é apûn awang nghut é Garai Gasang yhang, nungmoq lé, lhunglhang lhoq sân-yúng pyám byi sháng gaq; nga-nhûng é Yhumsîng Yesuq Hkrisduq dum lé é hkûn, nungmoq é woi-nyí, myit nhiklum, gungdu gi, mara hûn râ hkyô a

bò sháng gaq. ²⁴ Nungmoq lé ji yu é Sû gi, lhumzui é Sû nghut lê mù, Yhang, shí hkyô lé kut râ nghut lê.

²⁵ Gumang wui ê, ngamoq é matú kyû bo dung byi kó laq. ²⁶ Gumang wui banshoq bang lé, chyoiyúng é chyitpuq puq é dông bo shí-kyám byi kó laq. ²⁷ Gumang wui banshoq bang lé, hun kat é laiká shí nghap kyo râ matú, haû Yhumsing é myìng mai, ngò, nungmoq lé pying kat lê.

²⁸ Nga-nhûng é Yhumsing Yesuq Hkrisduq é jeju gi, nungmoq chyáng ru joq nyí sháng gaq ô!

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

23f9fc55-a8a4-59ef-9513-707ec336b0ee